


全邊略記




漢書門			
九	二	一	六
二	七	四	大
冊	架	函	號類

內閣文庫			
九	二	一	六
二	七	四	大
冊	架	函	號類

內閣文庫	
番號	漢 9116
冊數	24 (22)
函號	292 136



斬臣首以謝羣奸。營中見撫榜。逃者百餘人。賊有掠
縣令妻子者。燧殺之。攻破裕州。殺都指揮詹濟等數
千。劫庫釋囚。攻唐縣不能破。餽賊鞍轡二十副。燒民
居去。命右副都御史彭澤。節制寧夏延綏諸路軍。
馬討河南流賊。趙風子入泌陽。前大學士焦芳。僅以
身免。發其先世塚墓。無遺骸。取芳衣冠被庭樹。歷數
其惡。命劔士斬之。曰。使吾手誅此賊。以謝天下。進攻
鈞州不克。以馬文升尚書。家在圍中。引衆去之。時裕
州同知郁采。上蔡令霍恩。棗強令侯豸。各戰死。贈廕



有嘉七年二月流賊攻河南總兵馮禎戰歿。三月彭澤遣兵擊賊于西平。大破之。楚撫馬炳然爲賊所殺。轉寇至六安。攻破舒城縣。延寧軍追擊之。其衆多散亡。劉三楊虎邢老虎俱死。風子走至商城。削髮詐爲僧。欲投江西賊。遇趙成等執之。閏五月劉六劉七齊彥名等敗遁黃州。擄掠軍民。船入楊子江。下南京。操江官軍不敢逼。至鎮江。官軍禦之。敗績。劉六等欲自通泰登岸。趨淮安。復還山東。爲楊州官軍所逼。六月復自通州沂流上至九江。七月又下過南京。凡三往。

來如無人之境。八月舟至通州狼山。颶風覆舟。賊盡死。天也。九月論平流賊功。封太監谷大用弟谷大寬爲高平伯。陸閭弟陸永爲鎮平伯。咸寧伯鉞進封咸寧侯。並賜誥券。世襲。都御史陸完加太子少保。斯時也。毛銳已衰老怯懦。所領京營兵萬餘。未嘗經陣。谷大用驕貴。擁衆自衛。高坐堅城。罔知軍紀。銳至真定。遇賊大敗。損軍喪輜無算。幸許泰兵至援之。銳失所。佩將軍印。徵回京。不問失律喪師。罷歸私第而已。中涓大用同事故也。先是內閣票旨從楊一清之議。

能擒斬盜賊三名。顯者陞一級。賊雖擁衆數萬。其親信驍勇善騎射者不過千人。官軍每追及之。賊驅脇從棄敵。并棄所掠財帛。奔逃而去。官軍爭取財帛。及斬獲脇從。屢報叨陞賞。谷大用陸完得勅獎最多。大同遊擊江彬過冀州。入人家殺二十三人。有司申狀。大用完皆不問。復奏帶權勢子弟。僕從數多。坐冒功級者千餘人。日費廩餼。自出師芻糧犒賞。至費太倉金二百餘萬。帑藏爲虛耗焉。十月陳金檄副使周憲等分兵三路討華林賊。兵進失期。憲與賊戰獨深。

入賊憑高發擗石。憲死之。子澣從征。見父被執。躍馬前救之。中流矢死。事聞。贈憲官謚忠愍。仍旌其子孝烈。乃命給事黎奭往勘功罪。金檄按察司王秩南昌知府李承勳督兵勦之。承勳招賊首黃奇寘麾下。有智略。任用之。令宿帳中。奇感奮。誓以死報。勳乃令奇入賊寨。說其黨多來降者。與約期。承勳令土酋岑猛選精兵五百人。夜與俱至山下。降者來。旣見。復縱之。令爲內應。勳乃與猛師銜枚登歷重險。至壘。羣賊方鼾睡。夜三更。奇拔柵。帥衆奮力斫之。降賊亦合勢夾。

全邊略記
攻斬首三千餘級。餘賊奔壘逃匿。候曉搜山。所斬獲又千餘。華林遂平。於是移兵擊瑪瑙寨。東鄉賊皆平之。初成化間。劉千斤和尚相繼作亂。皆山西李姓者。以幻妄之術。左右之。及劉石敗。李挾貨遁。至是其孫李五世。習幻術。復來延安。坐覆深室內。令其徒黨鼓惑愚俗。謂彌勒佛出世。當王天下。某男當爲文武將佐。某女當爲后妃嬪御。令自照水中。果見冠服殊等。孚信不疑。照者果籍記姓名。出財舉事。遠近爭附。隨其貧富。所獻至有千金者。破產亦所甘心。或子女。

或器物。接踵而至。輜重潛移之。子身鼓衆。劫縣殺人。及官兵敵敗。五先遁。八年。時華林瑪瑙東鄉賊皆平。移師姚源賊。聞狼兵至。頗懼議降。按察使王秩欲受其降。已有納款者。議曰。賊反覆不可信。欲乘兵威撲絕。取來降者殺之。賊遂大亂。棄巢寨。奔突四出。踰饒越信。衝掠徽衢諸縣。皆被其害。已而官軍擒之。陳金奏立東鄉爲萬平二縣。分治以撫安之。十二年再平江西。初陳金封華林姚源諸賊。多所招撫。諸寇轉徒嘯聚。不數年。仍羣起爲盜。在南安有橫水桶岡諸寨。

賊首則謝志山藍天鳳等。在贛州有泃頭等寨。賊首則池仲容等。方千里。遭其荼毒。朝廷始以王守仁巡撫其地。集兵討之。守仁徵湖廣兵。夾攻桶岡賊。檄江西副使楊璋叅議黃宏知府邢珣等爲偏裨。相與議曰。桶岡地險。賊破爲難。然恃橫水左溪等寨爲羽翼。先破橫左。勢與楚合。觀望未備。可以移兵。乃遣都指揮許清自南康縣新溪入。知府邢珣自上猶縣石坑入。知縣王天與自上猶縣白面峪入。皆會橫水。遣守備郊文自大庾縣義安入。知府唐淳自大庾縣聶

都入。知府季敦自大庾縣穩下入。縣丞舒富自上猶縣金坑入。皆會左溪。知府伍文定知縣張戢從上猶南康分入。以遏奔軼。守仁亦親帥兵于南康。十月初七日分道並進。至巢三十里。駐兵募善登山者四百人。夜由間道攀厓上。伏覘賊先發其滾木礮石。十二日賊據險迎敵。忽聞近巢諸山頂砲聲如雷。大驚潰。遂破長龍等五巢及橫水大巢。邢珣破磨刀坑三巢。王天與破樟木坑二巢。許清破雞湖三巢。唐淳破羊牯腦三巢。又破左溪大巢。郊文破獅子三巢。余恩破

長流坑三巢。舒富破箬坑三巢。李敦破上西峯三巢。俱會左溪。楊璋等亦隨至。諸營各分道破二十餘巢。知府伍文定知縣張戢兵亦連破數巢。時已約湖廣兵于十一月初一日夾攻桶岡矣。遣素通賊李正巖劉福泰釋其罪。并縱所獲賊鍾景于二十八日夜懸壁入賊巢諭之。期鎖匙籠出告降。賊方恐見使至皆喜。不暇爲備。守仁遣使于鎖匙籠促降。而別遣邢珣帥兵入茶坑。伍文定帥兵入西山界。唐淳帥兵入十八磊。張戢帥兵入葫蘆洞。俱初一日冒雨入險。合勢

併擊。賊大敗。邢珣破桶岡大巢。又破梅伏烏池巢。張戢破西山界三巢。唐淳破十八磊巢。伍文定破鐵木里三巢。王天與破員分二巢。舒富破大王嶺巢。賊遁山谷。守仁乃命諸將分屯要害。以破上中下新地杉木坳十餘巢。賊敗餘黨奔入雞湖。穩下。守仁復遣諸將分捕之。於是橫水左溪桶岡之賊略盡。計出師凡兩月餘。前後破賊巢八十四處。擒斬賊首八十六人。從賊三千餘人。俘獲二千餘人。守仁議于橫水等處建城設縣治。控禦三省諸徭。捷聞。璽書褒諭守仁

擢右副都御史。諸將各賞賚之。先是守仁欲征橫水桶岡。慮泃頭賊乘虛出擾。使人諭降。賊首池仲容佯應以覘之。守仁令從征橫水。及官兵被橫水。池仲容懼。遣其弟池仲安詣從征立功。守仁厚撫之。令從別哨以遠其歸路。陰使人分召近泃頭諸縣被賊害者。授方略。令密部集後報師期。及平桶岡。仲容益懼。守仁遣使至泃頭。賜諸賊牛酒。賊詭使者曰。龍川新民盧珂。鄭志高。欲仇殺掩襲。故備非虞官兵也。守仁佯信其言。怒盧珂。鄭志高。移檄龍川。令廉二人擅兵狀。

且令仲容除道候事。平還兵討之。賊疑不欲假道。遣使來謝。無勞官兵。盧珂。鄭志高。陳英者。皆龍川已招新民。獨抗賊。賊讐忌之。三人來告變。言池仲容反狀。時仲安在守仁所。守仁陽怒三人讐誣。令仲安具狀。訴欲并拘其屬。斬之。械繫盧珂等寘之獄。密使至獄中諭意。盧珂等三人勿恐。遣使歸集眾以候。十二月。守仁還至贛。張樂大享將士。下令橫水桶岡以平。泃頭又歸順。境內無虞。宜散兵歸農。仲容意乃大安。守仁別購仲容所親。說仲容令自來訴。使盧珂等言無

所入。仲容信之。謂其衆曰。贛州伎倆。須自往覷之。遂率其徒四十餘人。自詣贛。守仁先已檄諸郡縣。及行龍川。盧珂等勒兵候報。至是探知仲容就道。亟遣使發諸路兵。刻期會泃頭。然道經賊巢。始達。則使別賫一檄。爲捕盧珂黨與者。佯示賊。賊見檄。遂不爲意。池仲容以閏十二月二十三日至贛。謁守仁。見軍門。無用兵形。又覘知珂等械繫獄中。意益安。遣人歸報。事無他。守仁乃夜釋珂等。使間道歸。發兵而令諸官屬。以次設牛酒。日宴犒仲容等。緩其歸。十三年正月三

日。度盧珂等已至家。諸郡縣兵當大集。守仁乃設犒。仲容等于庭。先伏甲士引擒之。出珂等狀。訊之。皆伏。遂悉置獄。而趣諸路兵。知府陳祥兵。繇和平都入。指揮姚璽兵。繇烏虎鎮入。指揮余恩千戶。孟俊兵。由平地。水高沙堡入。守備指揮郝文。知府邢珣。季敷。推官危壽。諸兵皆繇各路人。守仁帥親兵。由龍南縣冷水。逕入。直搗下泃大巢。諸路兵皆會於三泃。賊兵已散處矣。驟聞官兵四集。皆驚懼。乃分投出禦。而悉其精銳。險伏于龍嶺。官兵聚爲三衝。指揮余恩首擊賊王。

受等追之。賊伏起奮擊。王受適危。壽至前衝之。千戶孟俊又帥兵遶衝。伏賊大潰。遂克三洲大巢。官兵乘勝追擊。陳祥破熱水二巢。姚璽破淡方三巢。邢珣破竹湖二巢。郝文破曲潭二巢。季敦破古坑二巢。自初十日後。諸將連日又破賊二十餘。得其金龍霸王印。餘賊精悍者。尚八百餘人。聚九連山。山四面險絕。惟一道通。賊設礮石滾木拒之。官兵不敢近。守仁乃令官兵衣賊衣。抵暮詐爲賊敗奔者。山上賊見之。果招呼入。及度險。遂扼其路。賊始知禦之。則大衆繼入。賊

不能支。乃退走潰出。官兵先於四路設伏待之。二十日以後。諸將兵覆賊於五花陣。白沙銀坑水等處。追躡山谷。擒斬略盡。餘徒二百人。慟哭請降。守仁納之。乃親行相視諸險隘。議立縣設隘。畱兵防守。遂班師。蓋自正月移兵攻洲頭賊。至三月乃平。前後破賊巢三十八處。擒斬賊首六十餘人。賊徒二千餘人。俘獲招降千餘人。捷聞。守仁以前功陞秩。仍賜璽書褒賞。餘將士賞賚各有差。時中原之平盜也。以邊兵蜀之平也。以苗兵。西江之平也。以狼兵。而京省兵一

無恃奸雄生心日長矣十四年寧王宸濠見權倖用事深懷不軌賄結諸權倖招納大盜劫江湖間朝貴陸完錢寧等無不黨者楊廷和初亦庇之後覺有異主御史蕭淮論之乃以淮奏下制遣太監賴義駙馬崔元往切責奪其護衛夏五月也宸濠聞故知上有意督過遂決計反以六月十三日誕辰宴江西諸守臣入謝卽劫之乃夜集賊首吳十三凌十一等飭兵器以候詰旦諸守臣謁畢宸濠曰太后有密旨令我入朝監國今往南京汝保駕否都御史孫燧

曰天無二日誰則敢違衆駭愕失色副使許達抗辯大罵宸濠叱令武士縛燧及達曳出斬之遂執御史王金主事馬思聰金山及三司太監等下獄遣召致仕都御史李士實舉人劉養正至宸濠自出城迎之令參政季敷等持偽檄諭降諸郡縣十六日遣賊首閔念四吳十三等奪船順流攻南康知府陳霖等遁走進攻九江知府汪穎等亦遁城俱陷南贛都御史王守仁以公事將至豐城聞變乃退保吉安馳疏上聞請命將出師遂檄諸郡縣知府伍文定等集兵

全通明言
討賊。并檄鄰省赴援。時宸濠以兵未集。故畱旬餘不出。遠近得爲備。七月朔。始帥舟師趨南京。賊衆數萬。舟楫蔽江下。素通謀。太監畢真。令以淞江兵應。許之。遂攻安慶。知府張文錦。守備都指揮楊銳。指揮崔文。禦之。江西僉事潘鵬。安慶人也。被執。宸濠令鵬遣家屬。持書諭降。崔文手斬之。磔其屍投城下。居民登城詬罵。宸濠盡攻擊之術。不能克。朝廷聞反狀。乃收太監蕭敬。秦用。盧明。都督錢寧。優人臧賢。尚書陸完等。俱下獄。籍其家。時守仁檄諸路兵。期以七月十五

日會臨江。吉安知府伍文定。憤激之甚。屢趣守仁出師。適使者御史謝源。伍希儒來。守仁奏畱叅佐任事。九江府鄉官都御史王懋中。編修鄒守益。郎中曾直。評事羅僑。御史張鰲山。僉事劉藍。進士郭持平等。約爲叅謀。按察使劉遜。叅政黃繡。知府劉昭。驛丞王思。李中等。咨訪贊協。身督伍文定帥兵徑下。于是知府戴德孺。徐璉。邢珣。通判胡堯元。童珂。談儲。推官王暉。徐文英。知縣李美。李揖。王天與。王冕。各以兵來會。十八日至豐城。衆議所往。守仁曰。寧王久不克。安慶精

銳皆出守。禦必單弱。我兵新集氣銳。南昌可克也。寧王還兵自救。聞之奪氣。首尾牽制。此成擒矣。乃分其兵爲十三哨。哨三千人。少者千五百人。令伍文定等各攻一門。以四哨爲遊兵策應之。寧王別伏兵墳廠爲城援。守仁遣知縣劉守緒夜從間道襲破之。以撼城中。十九日發市。以二十日昧爽各至信地。守仁下令曰。一鼓附城。再鼓登。三鼓四鼓不登。斬其隊將。又先期爲榜。入諭城中居民。令各閉戶自守。勿助亂。勿恐畏逃匿。泊衆昇攻具至。城上雖設守禦甚嚴。兵

士皆震愕逃散。城門有不閉者。兵遂入。守仁乃入撫定之。時贛州奉新等兵皆降。盜最驍悍。然頗肆殺掠。守仁執數人斬之。衆稍定。擒拱襟及萬銳等千餘。宮眷聞變。縱火自焚。不盡者拘繫之。散遣脅從。府庫被宸濠取完軍費。及兵士略取不盡者。籍封之。城中始安。時李士實等勸宸濠勿還兵。舍安慶徑攻南京。旣卽大位。江西自服。宸濠不從。解安慶圍。移兵泊阮子江。或謂寧王兵威衆盛。守仁曰。寧王未嘗逢大敵。與之旗鼓相當。今進取不能。巢穴又覆。沮喪退歸。衆心

已離。銳卒乘勝擊之。彼將不戰而自潰。是日撫州知府陳槐亦帥兵至。守仁大賑城中軍民。慰諭諸宗室。榜示宥釋脅從。二十三日。諜報宸濠先鋒已至樵舍。守仁乃遣諸將帥兵迎擊之。令伍文定以正兵當其前。余恩繼之。邢珣帥兵繞出賊背。徐璉、戴德孺、張兩翼分擊。二十四日。遇宸濠于黃家渡。賊氣驕甚。伍文定。余恩佯北致之。賊爭趨利進。前後不相及。邢珣兵從後急擊。橫貫其中。賊敗走。文定、恩還兵乘之。徐璉、戴德孺兵合勢夾攻。賊不知所爲。遂大潰。追奔十餘

里。擒斬二千餘級。溺水死者萬計。賊氣大沮。退保八。字腦。衆見兵敗。亦稍稍散去。是日建昌知府曾璉等帥兵至城中。守仁謂九江南康不復。則道終梗。且湖廣援兵不能達。乃別遣知府陳槐、合知府林瑛之兵。攻九江。知府曾璉、合知府周朝佐之。兵攻南康。宸濠併力挑戰。官兵退。死者數百人。伍文定乃急令斬先却者以徇。身立銳砲間。火焚其鬚鬢。不移足。士殊死鬪。兵復振。砲及宸濠舟。賊遂大敗。擒斬二千餘級。溺水死者甚衆。賊復退保樵舍。聯舟爲方陣。盡出其金

帛賞士。伍文定等乃爲火攻之具。火及宸濠副舟。賊衆遂大潰。妃嬪皆赴水死。將士執宸濠及其世子。郡王儀賓。并僞丞相元帥等官。李士實。劉養正。劉吉。屠欽。王綸。吳十三。凌十一等。又獲被執脅從御史主事三司太監等官。王金。金山。王宏等。擒斬賊衆三千餘級。溺水死者數萬。棄衣甲器仗金帛。與積屍聚江中。若洲焉。餘賊百艘。俱逃潰。四出。諸將分道追擊。破之於樵舍。又破之于吳城。擒斬千餘級。守仁所遣陳槐。曾璵。兵亦攻復九江。南康二郡。擒斬一千餘級。將士

執宸濠等。凱旋入江西。軍民聚觀。歡呼之聲。震動天地。九月。車駕發京師。王守仁將獻俘。張忠。朱泰等。謂縱之鄱湖。皇師親征而凱。守仁乃乘夜過玉山。至杭州。告張永曰。民久經亂災。供京邊餉。旣極必逃。昔助濠脇從也。今窮激羣起。遂成土崩之勢。益以俘歸。首功于永。永乃徐曰。吾非爲掩功來。但順上意。猶可挽回。于是守仁以濠付永繫之。車駕至南京。命張忠等。同朱泰。朱暉。統軍萬人。往勦宸濠餘黨。給事祝績。御史章綸。紀功。時江西已寧。忠等搜求微隱。

羅織平善。妄濫誅戮。沒入其財貨。軍馬五閱月糜費
浩繁。憊矣。十五年閏八月。上受江西俘。遂旋蹕。嘉
靖元年正月。追錄平濠功。封王守仁新建伯。三年。泗
州洪澤江洋盜。艘動以千數。上命戶部侍郎席書
發帑藏。截漕粟賑之。又發帑金十五萬。分賑淮鳳二
府。其江盜。勅操江伍文定擒捕之。八月。遼東妖賊
李真陸雄等。聚眾謀不軌。入山海關。殺守關主事王
冕。守臣以聞。逐捕之。大學士一清疏曰。太祖設五
府四十八衛。太宗建都燕京。仍立五府。增七十二

衛。設五軍神機三大營。都城之外。設大教場操。又以
河南山東大寧中都四都司官軍。輪歲教月練。真居
重馭輕之宜哉。厥後承平。戎務漸弛。正統己巳秋。北
狄侵侮。幾危宗社。景泰初。尚書于謙。乃于三大營中
選精銳者。分立十營。是爲團營。體統尊嚴。條教明肅。
四方有警。或用一營二營三營。以次撥行。不俟臨期
泛選。其選之剩者。退回原營。謂之老家。天順初。罷之。
成化初。復置。後增爲十二團營。分布益嚴。嗣後因陋
就簡。垂四十年。而戎馬日耗。士卒之殷實者。以錢包

其荒。而其名徒存。饑寒困苦。氣息奄奄。平居日不能
自存。爲國捍百戰哉。遇警撥兵。未免復行挑選。恒以
不足數爲慮。是團營與老家無異矣。夫兵以衛民。民
以養軍。今各營月支米八萬一千五百有餘石。歲計
之九十七萬八千餘石。皆百姓膏血也。豈不爲之寒
心。至于統兵將帥。臨期選之。將不知兵。兵不知將。遲
慢軍裝。將以至闕。卒尚在城。都人相傳。爲笑嘆。正德
年間。山東北直隸。羣盜縱橫。乃調宣大陝遼邊兵。往
之。踰年始得平定。是豈強幹弱枝意哉。沛優恤之恩。

禁侵削之害。嚴役占之條。耳目一新。精彩丕變。所以
壯元氣。延生命。庶幾在此。乃條上六事。一本兵職重
事繁。宜設都御史專董營務。簡才望者充之。一坐營
官多膏梁統絢。不嫻軍旅。宜推用各邊閒將。經戰陣
者。一各營宜通行簡閱。選勇健者三千人爲第一等。
又選膽力過人。武藝精熟者。爲戰鋒。專備征。次者備
防弱者。退更之一。軍士操練。沿襲舊規。惟逐衆聚散。
今宜使熟知號令。人人習于進退之度。擊刺之法。又
簡其熟于武藝者各一二人爲師。聽其教習。責以成

效一各官役占者多。所操練征發。多係貧軍。而殷實強壯者。多包辦走役。不肯與焉。軍心怨憤。且管隊等官科斂多端。軍安得不貧。宜嚴治之。一京營之馬。壯大者。不以給軍。給過數月。隨即羸弱。斃者相繼。聞各軍一年全支草料者。只三月。餘月折銀。所折不足以供。立以待斃。宜量增其數。以恤貧軍。乃立法稽其倒失之數。覈其椿朋之銀。庶養馬者不累。被罰者無詞。疏入下部行。乃改刑書李承勳兵部兼右副都督營務。七年青羊山賊亂。巡撫常道請兵往勦之。遣指揮

秦州擊賊於谷底。堆挫賊首陳卿陳琦。賊徒猝至數千人。出掠壺關黎城潞城。事聞。以王應鵬往代之。同河南巡撫潘塤。及副使牛鸞僉事陳大綱。都督魯綱。往平賊。十月進兵。遂連破魯班壑。穿腦底尖。綻口。洪梯陡崖諸村。賊大潰。陳卿父子遁走。指揮查瑤千戶劉岱。市民曹浩等。襲破其巢。獲生口無遺。卿窮蹙。爲大綱所擒。給事中夏言劾綱等欺罔。且云翟瓚等奪險先登。搗其腹背。牛鸞楊朝鳳等。遇敵嬰鋒。扼其咽喉。陳大綱張羅。伏機塞其歸路。皆可錄者。勅言往

全邊略言
勘言至。躬履山形。平察賊衆。僂首惡散。招降撫殘民。亟宣賑濟之恩。以彰王化。請焚簿籍之餘。以安反側。仍建議改潞州爲府。地方以寧。牛鸞曰。陳卿小醜耳。孟浪虛喝。人心動搖。聚兵萬衆。屯守年餘。常道之輕謀好事。誠有如桂洲所論者。八年。浙江溫州守丁瓚曰。磐石衛逃軍糧可扣貯也。軍數百。披甲持刃。執主簿吳永。寘軍中。邀之。瓚支給之。而擁兵如故。御史王化以聞。曰。四月間。劇盜十四艘。登岸掠財擄婦。燒死男子房屋無數。此海道傳鑰之過也。下都御史平之。

常州江陰縣私讎盛行。操都御史孫脩擒之。其黨侯仲金等。復糾衆連數百。舳舻行劫。金壇主簿梁瑾統兵二百往勦之。被盡殺之。而支解瑾。百戶任臣投于水。有旨切責知府劉可。特命征之。遂平。三十二年。八月。師尚詔者。司市老人。歸德知府尹一仁。任以捕盜。遂橫謀不軌。結衆尅日舉兵。郡以他事遣卒至鎮。詔疑偵已。執殺之。以祭。率衆夜薄城。時已有中譎矣。開關納之。劫庫獄。捆載去。尚詔有令勿犯學宮。勿戮生儒。故守令皆匿學官以免。而詔家多金瑤娼姬。而

全通略記
柘城亡賴子。乘詔出掠所蓄淫其姬。詔圍柘城索之不得。乃破城獲副之。因掠公私帑。復圍太康。索所怨者二人。縣官執其人縋城。與之殺之。巡撫楊宜徵兵追捕大敗。官兵死者相枕。勢益猖獗。至數十萬。三十八年以海上倭盜及于腹裏。焚戕無算。語在海略篇中。于是福建巡按樊獻科言。近歲軍興。募集武勇。四方無賴子弟。每以投效爲名。所至騷甚。今廣浙閩俱警。宜遣還三省兵之應募者。原籍收爲鄉兵。卽以客兵餉贍。不惟客兵免遠調之勞。而各地方且獲鄉

兵之利。從之。三十九年南京軍亂。舊例南營軍月未有妻者一石。無妻者減十之四。侍郎黃懋官嘗歎曰。四十八衛卒。不敢敵二十七倭。焉用是冗食爲哉。各衛送支月冊。必詰其逃亡多寡。又奏停補月軍丁妻糧。諸卒忿甚。比大侵。月已旣望而闕符未下。直振武營操期。遂鼓譟圍懋官第。懋官聞變。踰墻而出。諸軍邀而撲殺之。懸其屍于市。脅兵書張鰲求賞。鰲錯愕不能應。誠意伯世延。劉諭之稍戢。兵侍李遂揚言曰。黃侍郎自踰墻死。各軍特不當殘辱之。不得稱叛。因

全通略言
麾亂軍退。衆求賞。遂叱曰。今日之事。若求復妻糧。月糧原額即可得。奈何大譟。乃議發賑人一金。補減折糧。餉始散。事聞。命擒治爲首者斬之。四十五年六月。湖廣承天衛卒。以求需月糧。擁衆入府門。毆擊書吏。知府鄭文茂。廉得其爲首者。執而鞭之。至死。諸軍益憤。因大呼。詈辱文茂。久之始解。事聞。上曰。軍玩至辱守臣。其嚴捕首惡。律治之。隆慶元年。大學士階等疏。團營起于景泰。至嘉靖庚戌。虜薄都城。戎務大壞。乃革營法。撤內臣。事權歸一。數年暫有成效。請勿

遣內臣。輕變先帝之法。上乃罷提督團營內使。萬曆十五年四月。張佳胤定浙二亂。進右都御史兼兵侍郎。時佳胤奉勅視浙師。浙故有幕府。親兵四千五百人。故少保胡纘宗倚之。起戰功。餉資至糜。故尚書趙文華稍爲裁縮。月一金。分營九。率以七營防汛。時當國者汰冗費。請減營廩三之一。新錢半之。錢法壅不行。無所得食。相號于兩臺。撫臣吳善言予錢自如。乃洵洵爲惡語。有二黠魁曰。馬文英。楊廷用。構其黨。謀于治餉僉事之門。遂闖入幕府。吳匿他室。跡

全邊略記
得之。擁至營。窘辱萬狀。兩臺使來爲解。責善言自書。腹削狀。以庫金二千資。乃縱歸。其明日。二黠魁相圍。結妮隊甲。陽自縛。以詣法。然兵皆匣刃。事聞。上與佳胤便宜行事。善言勒還里。候代于茗雲間。無何而市民變復作。杭十萬室。丘民蟻聚。文網束濕。弗堪。而城中諸柵。各設役夫。司于楸。諸上著戶。捐錢粟募遊。手充之。後更其法。必以身受役。又相率倚豪有力。以兔而游手。驟失募。亦怨。上虞人丁仕卿。素舞文。與市大僧相結。假利便。言之。監司守令。俱不聽。意念忿。頃

之仕卿坐他法。臺使者杖而囊三木。諸大僧遂嗾衆奪之。亡賴子立響應。至千人。指一二薦紳。能免應役者。焚毀其第。劫財。遂破臺使者門。監司而下。走匿佛廬。僅免。而佳胤抵加禾警至。抵臺治事。而諸亡賴嘯聚益衆。盡毀柵。及他麗樵。揭長竿。裂所掠袒衣。幟之。哀刃向臺。佳胤乃從數卒。乘肩輿出。謂之曰。女曹母反。反則移六師至。族女矣。且女必有所苦。與甚不平。衆乃以司夜役告。卽下令除之。衆雖陽散。而氣益張。乘夜復大掠諸巨室。且徧火光燭天。其囂與巷哭聲。

全邊略記
達旦。佳胤秉燭草檄諭以禍福。質明布之通衢。衆裂之。剽亦甚。佳胤以爲亂民之不戢。兵胡受戢。命遊擊徐景星。俾二營兵入。召伍長而撫之。曰。使汝以功飽可乎。衆唯唯。又進馬文英。楊廷用。密謂曰。壯士故不畏死。爲我倡。衆捕亂。功成有賞。令天下稱義士。二黠魁亦踴躍聽命。乃召徐景星爲中軍。營兵次之。前薄亂民。敗之于菜車橋。褚堂。官港。章橋。俘縛詣臺。仕卿在焉。五十餘人。皆梟之。轅門百人。悉放歸。佳胤具前事。謂有司舉行太過。裁脔太甚。苟欲自成其名。不顧

國體。不察物情。醞釀鳩毒。積久必潰。夫兵變民變。此特二端耳。天下隱憂。尚有深于此者。廟議爲之動。有所寬減。而賜佳胤飛魚衣及金綺。佳胤因陽謂二黠魁曰。功差足贖矣。予之冠帶。榜于營。曰。還舊餉。革錢不行。咸貼服。獨二黠魁者。始鼓衆入中丞。又以一死蔽若曹誅。姑予我棺殮。給妻子費。衆斂贈贏金數百。旣免。而不復反橐。始大恨曰。成我曹叛名。曰。二豎也。又賣我佳胤。乃命顧監司徐監司輩。建牙誓師。甫嚴。而徐景星以其名捕營各一人。若陳德勝。方子龍。

李文高張賢陳文滿吳章成遂斬之。已復捕馬文英楊廷用又斬之。凡九首。陳轅門外。而使使馳赦七營卒。又召其與討亂民者二營。諭曰。吾得汝主名。而故隱之。念向者尺寸勞耳。吏民懽呼。洊自是無警。十六年三月時黃梅賊首梅堂詹二漢劉汝國余孟新四人。創首凡七十餘人。擁入蔡永季搶掠。事聞撫按。斬州守徐希明。慮左右皆盜黨。致居民之有幹者潘案。托以擒盜。案設計與吏目蕭芬伺于宿松縣右車嶺。擒堂父子并獲劉汝國之妻。具知盜蹤。十七年正月

賊燒停前驛。往來長流二郎河。又往玉樹觀朱元三家。殺人開倉放穀。復到宿松廖佳賢家。近二百人。楚撫約南操江合兵勦之。都司周弘謨進兵至二麻尖。戰敗。州判陳策死之。于是集兵分路並進。賊焚營而逃。太湖縣鄉兵張惟忠生擒余孟新及劉汝國。餘黨悉平。二十六年。兵科郝敬奏曰。文皇帝以兵三十六萬屯牧近畿。與四十八萬京營兵相與表裏。而屯兵歲久漸消。人鮮知者。何不綜此爲守遼之備。所謂寓兵于農。不煩召募者也。言路李大用亦條及之。終

亦罔所施效。三十年長垣縣新立關廟。鄉人賽神。以毆而傷者百餘人。保撫孫琥奏罰其縣令張文煥。則祀禮之當恣也。南兵侍范崙條南京營之弊曰。選鋒曰占役。曰班軍。曰門禁。曰偵邏。曰浦口之乘城也。三十九年保定巡撫王國行井陘二道捕獲巨盜劉世第董世耀等一百五名。四十三年閏八月朔山東安丘縣被賊梁闖子張國柱等竊入劫庫。縱囚。知縣梁聘孟王鼎臣以才力降罰。是時益都縣金嶺賊占于鐵山。而臨淄新城長山爲之震。昌樂縣高陀店賊占

于崇山。而安丘以南爲之震。青州巡道李本緯牒于軍門錢士完以聞。山東安丘縣獄囚王淮。因畫計于胥劉建業。挺身殺賊自效。斬捕百餘。巡按畢懋康奏免其死。釋之。四十四年山東饑。泰安曆城間聚盜數百人。巡撫錢士完戢之。四十五年五月閩撫表一驥。劾奏稅鹽高案。剝闕一十六年積貲千萬。潛屬異志。造戎器萬件。造船入海。凡奸豪勇猛蹈險輕生之輩。收爲親兵。外圖通倭。內制閩粵。按劍一呼。兵卒雲集。先劫臣以諭散百姓。次挾道臣爲城下盟。福州府海

防同知陳豸。昔常盤詰其洋船。喝兵拘執。入維稅府。司臣李思誠。呂純如等往解。輒逢露刃。夫豸命臣也。幽囚擅虐。叛形已具。推其流禍。案不死于。皇上之法。而死于萬民之怒。上失誅惡之權。下受擅殺之罪。臣惟一去以明志耳。後召案還京。十二月。礦賊高二集衆千人。流劫靈寶縣獄庫。石知縣却之。已追獲。伏法。四十六年四月二十六日。常州鎮居民。忽相傳播。爭避倭寇。踉蹌于道。無慮數萬。自相較踐。棄男遺女。爭渡而溺。夫妻不保。武進江陰尤甚。是日孟河風發。

敗舟塞港。奸徒作是訛。以倖變也。按察使陳瑛具其事。南臺汪有功奏曰。流言不軌。宜亟弭之。時奴兒哈赤陷撫順。連克三堡。募兵措餉。言滿公車。南職方郎鄒維璉直陳調募之害。大約謂召募一着。可爲應卒之權宜。不可爲接續之長策。可爲遼左一面禦羣醜。不可爲天下州郡開大患。我朝設衛置屯。國無募兵之勞。民無餽師之費。今不思所以振舉之。舍兵索兵。兵弱如故。舍餉覓餉。餉匱愈甚。唐張說募曠騎。而府兵壞。李林甫停魚書。盡出于募。而府兵廢。李泌陸

贊悉謀復府兵。良有深見也。山西冀北叅政徐如翰極言。民兵不可調。疏謂今日最宜罷者。則無如各州縣民兵。此輩生長田野。不識軍旅。一行抽取。嚇詐百出。及其督行。則此離苦楚。尤不忍聞。職無暇遠引。試以山西言。集之省下。拘繫管攝。如同盜囚。驅之出省。號呼痛哭。幾慘天日。中途逃脫。往往而是。逃後復行。州縣拘執其父兄弟。以求索逃亡。獲之則箠楚縲綑。遣之赴伍。至則又使枵腹露處。筑筑無依。試思此狀。其可禦寇否。胡乃抽取之。以搖民爲。蓋兵部責各

鎮以空名。而授各鎮以實害。無如今日調遣矣。戶部主事楊嗣昌疏曰。今日之兵。征調召募。乃至二十餘萬。餉從何出。強寇在外。饑軍在內。蹈藉之患。不可測也。至于土兵四萬。取足六司。遠赴沙場。非其本願。設有趨趨抗令。母乃又增一奴乎。前者永順三千。止來八百。追逃無法。不過戮十四人而止耳。九月戶書李汝華采遼撫周永春之論。曰。敬循征倭。征播加。派往例。以萬曆六年所定田土。每畝權加三釐五毫。計七百餘萬頃。得餉二百萬有奇。戶科官應震條十四議。

部酌覆之。如南兵之庫貯。操江之存剩。溪湖之贖瑗。淞太僕之馬價。河道之餘積。及河工銀。此七款者。均縣官之財賦。然請發內帑二百萬。交章不報。若鈔關之節省。各郡縣無礙之搜括。兩殿中書之設差。戶上之援納。士民之捐助。從此利析秋毫。蕭然多故矣。右諭德徐光啓。以爲募調失序。徒紛拏也。上封事略曰。用兵之要。全在練。此人人所知。別無奇法。但選須實選。練須實練。若敵亦選練之兵。又須別求進步。務出其上。苟爲不然。卽強弱相懸。如卵投石。至則糜爛。奚

論衆寡哉。雖調集百萬。亦空傷民命。徒費資儲。而愚以爲今日之計。必須用管仲晁錯之說。在細謀而力行之。精求天下勇力捷技奇才異能之士。豐其餉給。原其拆損。優其作養。又精求良將以統率之。選用教師。羣居聚處。日夜肄習之。博求巧工利器。如車乘甲冑軍火器械等。盡法製造。以配給之。技藝旣精。然後教之。刑名節制。步伐止齊。分合進退之法。中間給以重賞。威以重罰。教練旣成。自能臂指相使。雖赴湯蹈火。無不如意。如是者。有士一萬。入可以守。出可以戰。

有士三萬。可以捍蕩逆奴。有士五萬。可以禦禦西北諸虜。使警不敢動矣。四十七年三月。楚撫徐兆魁奏部咨。土兵三千。以宣慰彭元錦知州田萬年彭宗卿統之。聞劉珽覆沒。各哭泣欲自刎。逃回數百。其離析如此。七月朔。湖廣武昌府囚曾星耀龔繼德者。革吏也。司理孫有祿發其事。成獄。與大盜王繼川合謀。而越擊殺指揮張明棟于武勝門。太守洗憲祖遇之漢陽門。誤中兩傷。孫被刺旋殞。官司雜捕之。巡撫徐兆魁以聞。議者以爲熊廷弼與星耀隙。必致之死。故有


此變云。天啓二年二月十三日。因廣寧之失。聖諭封疆多事。民困未舒。暫時加派。事平卽蠲。其帶徵先免二年。北直地方。苦累尤甚。併免加派。有司團練鄉兵。獎行智勇。河西避難士女。安插發賑。仍給屯耕。朕實不逮。負累吾民。祖宗金甌。朕不忍棄。四月十一日。白蓮賊楊子雨張世佩等千人。攻陷鄆城。知縣俞子翼逃去。賊自立兆順王。欲破鉅野。方及濮曹間。徐鴻儒其首也。都司廖棟張榜彭修盟。焚其梁樓十處。斬獲千三百七十二顆。報捷于巡撫趙彥以聞。鉅野知

縣趙延慶據城以守。復攻兗州。太守楊桶得資于魯主之餉。五月十七日聞香教二千人三更斬關而破鄒縣。通判鄭一杰挈印出走。同日滕縣亦被陷。縣令姬文印死之。十八日妖賊乘滕之陷從沙溝入夏鎮。掌閘主事陸化熙馳請漕院發朱守備千人又馳徐淮道發劉叅將二百協之。適募院游士任之兵至。化熙又請部院檄畱葛秉忠敗于河堤之南。宦弼被殺。六月四日返滕。六日陳所學朱兆南大破之。斬捕郝二首少齋周念菴楊三師張布還等大約六千餘。其

被撫者給累歸農。嶧縣遂復而剡城曲阜之圍解矣。徐鴻儒逃之不獲。二十二日賊伏沙溝期奪糧艘。哨官姚文慶率鄉兵捕之。斬孟光漢等。時焦續後抵夏鎮。驅斬賊無數。賊乃從東路白溝山走之。七月七日平紀王城。十九日東帥楊肇基挑壕築堤與賊相持于鄒縣。鏖戰數陣。賊返而嬰城。九月初三日楊肇基合天津來斯行之兵平錫山。克復滕。賊離滕據兩伏山。伏山者俗呼鍋裏六。猶柏人也。計十萬。一欲扼運道。走徐淮。一欲北救鄒縣。初七日我師疾趨山北。王

化淳蔣總芳來燕禧張泉實等。用火箭火車。其聲震天。十四日窺其走鄒。設伏于峯山南。賊更走據四山。復斬二萬餘級。衆獻鄒付師于城下。獲賊首任之體等。賊乃拔落鄒城旂。而請降。劉家漢錢體乾梁汝霖馬如翰冲鋒圍之。鄆城鉅野皆復。恤征妖陣亡者五十三人。張榜張國攜朱廉馬負圖張習李騰蛟樂疑忠馮遇奇胡永泰秦邦疑朱嘉賓王三重馬虞禎趙洪勳谷之秀胡鶴齡賀希聖芮嘉元陳謙詹鞠躬蕭景曜呂永年房可與范桂鄧雲忠林鎮邦王建功韓爲將朱俊臨呂成名陳富用武樑張翰相張國勳高萬仞陳高第趙仕順徐希順劉鳳曾鳳譚寅亮李恩譚奇黃德明李秀陳安馮韜李和王贊陳譽劉仁劉貴余選陳大用葉雨萼張漢麗承經李守綱

陳評八月初二日保定撫張鳳翔奏曰。鄒滕鄆兗首發大難。而武邑衡水棗強繼之。傳頭大主。則于弘志景州李隱馬習之。白晝鈔掠。白蓮聞香無爲龍天等教。遍傳域中。如深州束鹿饒陽武強獻縣清河故城冀州南宮清河藁城晉州安陽。氣候相通。共數十萬。卽遣轄將張體乾蘇從訓錢體乾協勦矣。初八日巡道來斯行。一鼓而併擒之。時妖賊叢于界河驛。攻兗府。楊肇基拒斬七百餘人于總庄。賊悉走。巡撫河南馮嘉會亦告急曰。陳州康安侯。睢州柘城。四大惡主。固



始會首劉化龍。共結數萬。剋日舉幟。僞受妖術。汝寧守王應楫。固始令高捷。深憂其衝。請益以兵餉。把之于河。十一月。東撫趙彥善。後事宜曰。省城臨德。兗濟曹沂間。增兵九千。馬二千四百。留運餉以給之。不足。則召買與贖。鍰以助二東之鞏也。捕得真徐鴻儒。遂平。三年三月。御史胡良機。諫內操曰。內操作俑于劉朝。寒暑不輟。今逐其身。行其言。卒墮其術。昔唐人嘗令宦者監軍。使驍勇爲牙隊。以自衛。觀軍執小却。引旗先走。陣從而潰。常侍典兵。每移運祚。此輩衛于人。

非衛人者也。九月。操江熊明。遇上機事曰。宗室睿。燼身長七尺。輕財博塞。而常州陳鼎。相自負能兵。占候星氣。收匿江南北盜賊。養死士胡五。爲飛將。湯之輅等。羽翼之。其父武庫郎賢者也。曉示禁止。而諸奸出入太湖。今兩郡所搜書賂。頗有狀。擬以窩盜妖言。吏案行誅。足矣。十月。妖賊蓄于山東二岐。山西伏山之餘孽。喬化宇等。鼓聚四五百人。以初四日攻沛縣。焚其廂關。劉令憑城。鬪拒斬賊一人。得生口六人。餘走去。淮徐道宋統殷窮。治其事。龍華會首。金科馬永等。

也。臚列六十二會。分開四十二天。刊著經書。出沒萬態。總漕呂兆熊以聞。十二月三十日。浙江有白巾黃袴賊數十人。乘夜入長興縣。總囚劫庫。生得知縣石有恒。不屈殺之。主簿徐可行亦被刃。士民分捕孫奇。吳野樵許畫近等。而宜興吳縣吳江廣德。皆震鄰如沸。嗾御史楊維垣以變聞。曰。葉朗生之流也。四年正月。有司奉迎當道。放燈杭城特盛。因失火。把總陳奇往救之。路逢生員許溥。怒其不讓。糾眾毆之。家丁李才以護主故。歐生員陳奇。知眾兵意。素苦夜巡。又夙

恨于家幹之凌辱者。遂倡眾毀所擊柝巡舍。駿駿有波及巨室。語把總楊茂忠。止其麾下。勿與亂。陳奇與茂忠隙。鼓眾以茂忠者。巨室鷹犬也。往集茂忠所。破其門壁。茂忠又貼示本營曰。壞垣未足介意。九營俱動。我營未出。示遵法也。奇輩大愧憤。爾倡為退悞。坐我等不靖耶。誘茂忠縛之。欲集射其胸。陶起翔為乞宥免。適巡撫王洽至。取奇等遣配。褫斥之。又緝責隊卒凡十二人。諭之曰。問爾等私戒不持寸刃。但迫主將令耳。營伍晏然而定。詔可之。二月十八日。戎政

侍郎朱光祚。申明會典疏。一曰養贍米。付將叅遊佐坐官共三十五員。月支五石。選鋒千把總二十二員。月支三石是也。一曰家丁口糧。各將官隨任家丁共二百五十六名。月支二石是也。一曰選鋒一萬。月糧二石是也。一曰壯丁七千二百。月糧一石五斗是也。一曰裁併軍。裁新設振武營。併補舊營之缺。月糧一石四斗是也。一曰三大營與兩標營官軍。額設戰馬二萬五千四百五十二匹。除見缺外。實在一萬八千三百七匹。月支草料銀八錢五分是也。此六款造支。

在營。故總辦得問之。此一欵造支在衛。非京營所得而問矣。一曰火器手小糧。計戰車兵營有五千三十名。每春操兩箇月。支二斗。秋操三箇月。支四斗五升是也。一曰三撥行糧。每秋操三月。壯丁與標戰車三營。軍支九斗。城守營。軍支三斗是也。此二欵係衆營支。然衛所既先冒月糧。則小糧行糧亦與之俱矣。一曰冬衣布花。每軍選歲給布二疋。綿花一斤八兩。鈔二十五張。營衛兼支是也。伏睹大明會典所載營制。府庫前衛等二十四衛。蕃牧等三所。隸五軍營。大寧

前衛等二十七衛。隸神機營。金吾左衛。二十七衛。隸神樞營。至燦然也。嘉靖乙卯。議准將大小衛分。相兼搭配。務令一衛專隸一營。或多寡不齊。務將一所盡屬一營。精壯作正兵。老弱作備兵。各衛告補。各清解首逃軍役。及營操官舍。悉照編定營伍。分撥遵守。甲子年議准。營正兵。及原屬衛所。每衛各造一冊。營中據冊稽查。衛中憑冊支餉。其有逃亡事故。卽開報之。在衛卽與住糧。容隱者送問。又隆慶壬申。科道梁問孟等條議。創併營衛事宜。可考。煌煌令甲。誰敢擅更。

不知起自何年。一聽營衛官。恣意混淆。有一衛一所。而散之十小營者。有一營一司。而雜見各衛所者。以頭司言之。查得第一隊軍五十名。府軍前衛二十二名。義勇前衛羽林前衛永清後衛各四名。龍虎衛忠義前衛各三名。瀋陽左衛二名。畱守左衛右衛義勇後衛大寧中衛神策衛龍驤衛瀋右衛各一名。舉一司而他司他營可知。如此軍藉何由而清。餉蠹何由而去。然則部科之欲責成營衛。各就所屬告冊相同。方准支糧。遵祖制也。豈臆見哉。四月廣東米價湧

貴每石至一金有美。衆乃歸咎白艚。白艚者閩販戶也。時巡按陳保泰知府程光陽皆閩人。百姓詬其私糶也。羣造郡堂訟之。光陽曰。吾聞價更高。此何足多。百姓大憤。起而毆之。光陽避入院。已又羣噪院門。陳保泰言答復厲。遂被辱。挾徒步三司之門。藩吏恐于庫藏。閉不入者久之。總戎崔天錫都司鄭維城藏兵大衆中。護按院以出。旣而裸裎。無儀之咏。溢于都會。知縣羅萬爵張國維慰解之。總督胡應台具題。於是布政饒景暉及總帥以下皆被罰有差。十月山東妖

人王好賢者。徐鴻儒之師也。收蓄生徒百萬。以鄆城蚤發而敗。遂逃于淮安。爲太守宋祖舜所捕。根株芟矣。五年四月。漕船露囤于武清水廠之地。夜有巨盜。劫鎮海衛糧二百餘石。一馬負二囊而行。往南幫以去。御史許其孝劾奏。晚兌稍稽。回空不蚤。軍書委積于河崖。雨浥濕耗。固無論。乃大盜公行。從容趕馬。亦旣多矣。押運者有在壩之旅。偷安多未獲之卒。何怪乎長驅而廣捲也。卽下遊徽雜捕以聞。六年九月。兗州賊鄭江鄭海孫東溪。結于呈家庄。接于開州。鋒莫

可當也。巡道曹文衡。檄叅將陳思明。設伏格鬪之。賊首就擒。東省乃寧。

職方氏論曰。功令甄別吏材。必分邊腹。邊治多兵。腹治多民。養腹之脂。固邊之郭。若元氣然。設衛置屯。兵民不擾。太祖有曰。朕興師百萬。不費百姓一粒一錢。故撻伐張皇。而蠲租減賦之詔數下。雞鳴犬吠。煙火萬里。黎庶蒸蒸。忠節濟濟。蓋至靖難師起。鼎革誅夷。而後轉東南之漕。濬惠通之河。紅朽陳殷。屯營急寄。齟引變更。年例溢額。漕折之外。鋪及民運。節旄薦

增。闔尹侵貴。金花之儲。權礦之採。既已。惟王無會矣。備官冗食。債帥攫金。文武交偷。於是乎。腴腹以腴邊。而江防。湖防。河防。銀坑。鐵冶。香課。鹽場。皆非百年無事之區也。衛所星羅。京營垣統。機牙本自周知。而象人塗馬。類乎駢枝。遣京軍。則累邊以贖功。調邊軍。又藐腹而肆志。夫兵食其力。而民不知者。化國也。民出其力。而兵知愧其食者。強國也。承替之主兵。自賣其所食。召募之客兵。索數倍于民者。敵國也。衛尚莫興。募亟難損。萬乘駟鈞。患貧患弱。是遵何道哉。正德


全邊略記
快駿馬之遊。集豹房之樂。逆藩蓄異。劇盜如蠶。累卵
厝火。奚足以喻其危。王文成仁守寓剪滅于保甲之中。
彼也。謀之累世。此也。屠之一月。而讒言罔極。黑白幾
淆。兵不交征。餉無括槩。可謂社稷臣。是時守令援枹。
咸備干城之任。慎斯道也。以往。何必中州毛卒。義烏
勁旅。而後可耶。萬曆之季。聚斂之臣。褒其豫大。閩有
高家。楚有杜茂。陝有梁永。江西有謝鳳。滇有潘榮。湖
口有李道。粵有阮鼎。叢神桑癘。未能宣上德意而
鴻雁碩鼠之歌。苦焉。然猶志存賂賤。未縮組圭。金鏡

常懸。太阿獨運。莫不懷恬熙之風。而泰昌晏駕。釀及
天啓。胙土寧公奔走天下。臣民供其鍛鍊。權收史館。
祀篡辟雍。郡縣左藏。搜括殆罄。吏習民艱。痛哉瘠矣。
此皆宰相之罪。非白纓盤水之所贖也。夫治天下者。
以民心爲本。本固邦寧。分乎撫虐。民窮則變。剝上反
下。赤眉不假于匈奴。黃巢非資于回紇。橐籥其在。中
乎。

今上開中興之造。順流更始。大法小廉。精遴守令。廣寓
折衝。則弭盜安民之要術。豈徒相縻以繡衣之文。而

全邊略言

巳



西條西村

